



ن

إسم الكتاب : موال الليل

إسم المؤلف : فاطمة فهمي

إخراج فني: ملتقى ابن النيل الادبي

تصميم الغلاف: ملتقى ابن النيل الأدبي

رقم الإيداع : 29160/2019

الترقيم الدولي: 0-81-6668-977-978

المدير العام : عادل التوني

المدير التنفيذي: عزة إبراهيم

٠٢٣٩٧٦٩٧١٧٦/٠١٠٠٦١٤١٦٤٥

لا يسمح بإعادة طبع ونشر هذا الديوان او اي جزء منه بأي شكل من الأشكال او حلقة او نسخه في اي نظام اليكتروني او ترجمته إلى اي لغة اخرى دون الحصول على إذن خطي مسبق من الناشر او المؤلف وإلا تعرض فاعله للمساءلة القانونية

جميع حقوق الطبع والنشر محفوظة للمؤلف

ملتقى ابن النيل الادبي

الآراء الواردة في هذا الكتاب لا تعبر بالضرورة عن
دار الفراعنة للنشر والتوزيع والترجمة



دار الفراعنة للنشر والتوزيع والترجمة

إهداء

موال الليل عزف منفرد من القلب للقلب
على تقاسيم الناي و مداعبة الأوتار
بلغة بسيطة أهدي تلك الكلمات إلى
أم الدنيا ..وأهل المحروسة..

فاطمة فهمي

حرف وقلم m

كلمة الملتقى

مازلنا نفتش بحور التميز عن المبدعين في محاولة لمد جسور التواصل بينهم وبين القراء
في كل مكان بالوطن العربي

وفي بحثنا الدعوب في هذا الصدد كان لقلمك الباذخ وميض اللؤلؤ في العيون ووقع النغم في
القلوب

لهذا نقدم للقراء قلم الكاتبة فاطمة فهمي

دعما لهذا التميز وأملا في انطلاقة قوية في مجال الأدب

حسام عزام

خزائن الأحلام

من وراء ستار الليل
ظهر نجم يلمع
في السما
ميل على جبين القمر
وهمس ...
أفتح لنا خزائن
الأحلام
أفتح للعشاق
يعيشوا الحلم
عندنا
وعلى جناح الحنين
يطلعوا هنا جنبنا
يسافروا بالحلم
بعيد عن عيون الكون

أفتح لهم يا قمرنا
وطل عليهم طلة
وأزرع ضياك في
بساتين الأمل
يمكن حد منهم يلاقي
حلم كان غايب عنه
يلاقيه عندنا
ويفرح زينا
وأنا من هنا هأنده
مغنواتي الحي
يغنيلهم غنوة حلوة
ملونة
بألوان الحياة اللي
نفسنا نعيشها كلنا

.....

صوت الذكريات

بنيت سور عالي
وخبيت وراه الذكريات
لكن أغصان شجر
الحنين
طلعت وكبرت
وطلت
من فوق الجدار
زعت وصرخت
وعلا صوت الذكريات
واتلم العاشقين
يعزفوا على الناي
و مغنواي الحي
بطبلته
يدق على الأنغام
ومنين أجيب قلب

يتحمل صوت الحنين

ومنين قلبي يتحمل

وهج السنين

يا عم يا آلائي

غنيلي غنوة تطرب

القلب الحزين

وتشعل فتيل البهجة

في قلب المحرومين

غني وإحنا معاك

سهرانين..

نطبطب على قلوب

مجروحين..

.....

شعاع مكسور

وفي الضلمة يشق العتمة
شعاع مكسور وصوت مبتور
ونغمة ناي بتبكي
ودقة قلب مكوي
بنار الزمن يدمي
ودي نجمة طالة
من بعيد لامعة
مكتوب عليها حرف
يمكن يكون رسم
لقصة كانت جوه الحلم
وكانت سر شايله القمر
بكفوف الضي حافظه
وف غفلة من الزمن
سقط السر من أعلى سما
نزل على أرض فضا
لا لقي شيء يستره
ولا لقي صاحبه
اللي شاله من سنين
وفضل ماشي
وضل الطريق..

.....

يا ليل

عاشق جمال الليل
بأقول وأغني ياليل
تسمعها ودني وتدمع العين
ياليل ياكاتم أسراري
يابدر طالع ورا السحاب يلالي
قول معايا.. غني ويايا
أنا اللي عشقت
ودبت في جمال العين
أنا اللي قلبي إتقسم نصين
يوم ماشاف الجميل
طالل على الغير
آه يا قلبه الحجر
ساب قلبي الجدع ينفطر
والدق على طبلي جبر
وكسر قلبي لساه ما انجبر
إصحى ياقلبي فوق
دا قلب الحبيب حجر..

.....

الفرح له ناسه

و يزيد الزمن في عناده
و فجأة تلاقي
كل اللي حواليك
بيستكثروا عليك الفرح
و تلاقي اللي يقلل من نجاحك
و اللي اصلا شايف
أنك موهوم
والنجاح مش مكانك
و ده واحد شايف
انه احق بمكانك
إيه يا زمن... مش كفاية عناد
و لا الفرح له ناسه
و الحزن بس ..
من بين كل الاتواب
هو اللي على مقاسي
و الله القلب تعب
من اللوم و العتاب
و لا كان لازم اتنازل
عن الأحلام
عشان يبقى مكاني
صح في عيون الأنام

هل هالك

بعودة الأيام يا أهل
بلدي وحبائي
يا عشرة بين جيراني
وأهل حيي
من العام للعام
بشوق الحبيب
نستنى هالك
يا مجمع العيلة
على اللقمة
يا زارع الرحمة
في قلوبنا
كان زمان...
روايحك تهل على
بيوتنا
والخير يملا جيوبنا
كنا نزور الأهل والجيران
وندق ابواب الزمان
اليوم رسالة واحدة
تنسخها وتلف بيها
على الأرقام
وكائننا أصبحنا

مجرد رنات
فين المشاعر
فين راح الود بينا
يازمن العجايب
أيام زمان هتفضل
معانا
وهيفضل الخير
جوانا
إوعى يابن آدم
تتوه بين الآلات
إوعى تنسى حق
جارك والذكريات

.....

زمان

إحكي و سمعي

أحكي على الزمن

اللي فات

وأخذ معاه أجمل

ذكريات

سمعي جمال

العبارات

و موسيقى الحروف

بتعزف على الأوتار

قول للشباب

آن العيب فينا

الزمن برئ من الإتهام

آحنا اللي نسينا

إزاي نحب بعضنا

إزاي نساعد المحتاج

علمهم إن الحنين

للزمن القديم

ده مش عيب فينا

ده آيمان بالخير

اللي جوانا إتزرع

من أهلنا

و اللي بنتمنى نعيشه

اليوم و تتعلموه مننا

.....

ضي و صوت

ضي خفيف

وسط عتمة الليالي

ده ضي القمر

ولا نجوم السهر

و اللي بيرن في الفضا

ده صوت قلبي

ولا همس الندا

اللي بيسحر أوتار الحنين

ولا يمكن صوت

حد بيغني

بيدق دقات شجن

بيطرب جروح القلوب

اللي تاهت في الدروب

إرمي حمولك على

اللي خلق

اليوم يعدي من غير قلق

دقات المطر

على دقات المطر

سهرانين

نغني غنوة للعاشقين

نغني موال السهر

و الفكر سارح

بين نجوم السما

و الحلم اللي جوه

قلبي ساكن

بينتفض...

ألوانه ساحت

إختلطت و رسمت

شئ محدش يفهمه

إلا اللي بالفكر إبتلى..

.....

شكل ثاني

شمس تطلع
تملا الدنيا بنورها
وف بلدنا
شمس ثانية
جايبة الدفا
من قلوبنا
والنور من حضارة
آلاف السنين
شكل ثاني
غير كل الأماكن
نظرة واحدة
ع النيل العظيم
تلقى قلبك سافر
نظرة ثانية ع الهرم
تلقى الشعور بالفخر
غامر



الدم غالي

الدم غالي

والتراب غالي



و أنت ماشي

حاسب و هدي

دا تراب بلدك متحني

بدم ولدك و ولدي

حاسب و سمي

وأدعيلهم زيي

دول اللي ضحوا

عشان انت تعدي

هي المؤامرة خلصت يا ولدي...!!

دي معششة في نفوس
مريضة شاربة الخيانة
و آه يا حرقه قلب أم الشهيد
آه يا وجع قلبك يا مصر
على العريس يتزف للجنة
و الأندال عايشين
ينهشوا في لحم بهية
بس الأسود صاحيين
دي حرب وجود يا سادة
ولا أنتم مش عارفين
واللي مافهمش
مالوش عازة

ولو لسه مش حاسين
أو لسه مش فاهمين
تبقوا مش عايشين
تبقوا مش مصريين
واللي فاكرينها هتتكسر
نقولهم.. يا اذئاب الشر
دا بعدكم
دي بهية بتودع الشهداء
بالزغاريد
تكسروا مين يا مغيبين
ده شعب قوته وعزيمته حديد
إيد على إيد
نخلي الصعب يلين
و عدي يا مصر
من قلب النار و الحديد
إن راح شهيد
فيه ميت مليون
تحت الطلب...قادرين



مش هتهزمني

أنت فاكّر
أنك هتهزمني

وانك هتمكن
الحزن مني
انت واهم
لو تفكر يوم تكسرني
دا انا المصري
ضد الكسر واليأس



ضد الحزن
أنا اللي
بأودع شهدائي
بالزغاريد
وأغني وقلبي
متقطع على
الغاليين
في عز القهر
أضحك من قلبي

وأقول نكتة
وأرفع علم بلدي
دا هو دا الفرح يا ولدي
أنا قدرك
اللي ماhtقدر
يوم تغيب عنه
اللي محير عقولكم
بصبره و جلده
عرفت ليه أنا مانهزمش
أنت ضعيف وجبان
وأنا الإنسان
علمت بحضارتي
في الأكوان.
أقولك ثاني..
مش هتهزمني
مش هتكسرني
أنت اللي مني مرعوب
ونهايتك على يدي.



حقك عليا

يامة القلب موجوع
والخوف بين الضلوع
بيرمح وفارد القلوع
وانا جواي غصة
بتصرخ وتقول
ليه يامة قاسية عليا
ليه كل ما اقدم خطوة
ألقى على دماغي الضربة
تهد جبال..
أنا كل حنة فيا بتغني
لهواكي موال
لساي بابكي
وانا بأسمع نداكي
لساي بأنفض توب المرار

واجري في اول الصفوف

أشيل علمك وأعلي رايتك

لسه الحلم الأخضر مزروع

في ارض بور

ليه يا غالية..

دا انا بأموت كل يوم

عشان تعيشي

ليه القسوة يامة؟

ولا السؤال كان معكوس؟

أيوة..معكوس

طب هو فيه أحن منك

دي القسوة في قلوبنا

إحنا اللي حملناكي

فوق الحمل

إحنا اللي عملنا الثورة

وإحنا اللي بنتكاسل

الضمير جوانا غاب

يبقى نفوق..نكسر حاجز

بناه الغدر في عقولنا

حقك عليا يامة .. حقك على راسي

والف بوسة أبوسها

وأخلي السلاح صاحي

ومين يضل عليا غير شجرك

ومين يرويني غير نيلك

ياست الكل أنتي .. وتاج راسي

حقك عليا يا مصر..

سامحيني..

.....

أكتوبر



اليوم ده عيد
اليوم ده فرحة قلبنا
اما قدرنا نرجع أرضنا
الله أكبر جلجت في سمانا
و بسم الله فتحت
طريق عبورنا
الله أكبر يا شهيد
علمتنا معنى الحياة

رفعت راية بلادي في السما
رديت كرامة الوطن
في عشرة رمضان
دمرتوا اسطورة عدو
كان بيتباهى بقوته
والنهاردة مكملين حلمكم
ضد إرهاب الدين
ضد خونة الأوطان
و النصر جاي يا بطل
طول ما
الله أكبر و بسم الله
شعارنا في معركتنا





قدنا

عد يا عداد النجاح
علم ولادنا معنى الكفاح
الحلم كان صغير على
كبر يوم بعد يوم

دلوقت اصبح مين قدنا
الحلم حلم الولاد
القصة هي امنا
إزاي نثبت لها اننا قد التحدي
إزاي جاوبنا ليهم
ع السؤال .. اما قالوا
أنتم مين...مين تكونوا
قلنا وبنقول باعلى صوت

إحنا الفراعنة
النيل يجري في دمنا
إحنا ولادها اللي بنموت
عشان تفضل بهية
واللي نعيش نبني مجدها
إحنا الفراعنة اللي اما بنقول
بنكون او لا نكون
قولي بقي حضرتك ..
يا للي سألت إحنا مين..
انتم مين..!!



موال الليل

دارت عقارب الزمن
فاتت سنين .. فات الكثير
والحلم عمره ما اكتمل
الحلم سافر



ويا قلبي
اللي إنكسر
غادر محراب الأمل
ومشي
في سكة القدر
دارت عقارب الزمن
يا عم يا ناياتي

تقدر تنسيني
همومي والشجن
تقدر تطلع من قلبي
السكين اللي إنغرس

ولا تقدر تغني
على موال الليل
وتسمعنا صوتك
اللي بيسحرنا
ويصحي القلوب اللي نائمة
تسمع منك العجب
سمعنا ... قول..
دا القلب لسا بهيرم الكسر
ويطيب الجرح في قلب الشجن..



حكاية حبك

ولما حكيت لي
حكاية حبك
قلبي وجعني
أيوة..لأني
شفت في نفسي
كسرة نفسي
شفت حياة
ماكنتش حياة
أيام وبتخبط فيا
لما حكيت لي
لقيتني بأقول..
مش دول ناس..!؟

أمال مال الدنيا
ومالي

رشت جاز ع الإحساس
أو قول يمكن داست قلب
كان مليون بالأشجان
لما حكيت لي
قلت ياريتني
ماسمعتش منك
قلت ياريت كنت سكت
بس الحق...
قلبي بيرقص
من فرحته بيك
وأدعي وأقول
يارب بجد..
أسعد كل قلوب الدنيا
بكفاية قلب
فاق من نومه
شاف الشيب غطي الراس
والإحساس..
يمكن ده الشيء اللي
طول حبة
في عمر القلب..
وخلاه عاش..
♥♥♥♥

إيه اللي اتغير

وكان إيه اللي اتغير

وطبعك ساكن

فيك ماتغير

وأنا باشوف وأتغير

يقولوا بكره هيفهم

بكره هيغير من

كلامه ويقدر

وجه بكره

وجه بعده

وأنت في دنيا

تفصلك عن دنيتي

بألف ميل سير

وإيه اللي إتغير

يمكن انا...

أيوة انا..

من كتر الهم
غابت بسمتي
وفكري بقى متحير
طب وإيه الحل...
الحل إننا نرجع بالزمن
نتولد من جديد
يمكن وقتها نتغير
آه يازمن..
كل يوم تناولني
كف على الوش
يرسم خط
من خطوط خريطة
لا يمكن يوم
هتتغير..



قاللي

قاللي....

يوم ما تقولي آه
يوم ما توافقي تبقي
شريكة حياة
يومها هابقي أسعد البشر
يومها اكون وصلت للقمر
قاللي هتكوني أمانة
بين إيدياو مسئولية
قاللي عمري يوم
ما اسمح لنفسي أزعلك
عمري ما أقسى
وعمري ما انسى
إنك نعمة من ربنا
و إنك النور اللي
قلبي بيه إهتدى
أنت حاجة اكبر من
اي حلم مر في عمري
وإنتهى

قالي ..هتكوني ملكة متوجة
بس ترضي ..يارب ترضي
قلت ...راضية
فين ألاقي حب زي ده
هو قاللي كل حاجة
بس يا خسارة
ماعملش منها .. أي حاجة
غير إني اصبحت كومة مهمة
شئ أساسي ضروري لحياته
لكن حياتي..هي فين!!!
القول كتير..
لكن ساعات صمت الرجال
بيكون كنز م الأفعال
كلام صادق جوة القلوب
مش كلمتين مكتوبين
على رمل هبت عليه
رياح الزمن..!!
♥♥♥♥

واحد شاي

واحد شاي..

في الخمسينة على

مية بيضا


واحد قهوة...

في الكباية بلاش العوجة

قعدة في وسط الناس الحلوة

عم حسين يرمي همومه

في حجر أمين



يحكي يفضفض كلنا سامعين

دا يطبطب ودا يواسي

وصوت الطاولة يرن

وصوت القهوجي عالي

وراديو يغني أحلى كلام

وريحة فرن جنب القهوة

تملا المكان

ودي خناقة ما بين إثنين
دا يشتتم ودا يهدي
وعيل راكب عجلة بيخبط
في كراسي الناس
ويجري بسرعة من خوفه
ودي زفة بنت
من بنات الحي
زغاريد و فرح بين الناس
ويرجع تاني
صوت القهوة
يعلى ويعلى ..
وأنا عيني بتحضن
كل الناس..



باب الهوى

دق على باب الهوى
إفتح شبابيك الشوق
علم القلب إزاي
يدق دقتين
دقة خوف .. و دقة شوق
و إنطق يا سهر الليالي
قول إزاي سماك
مطرت دموع حنين
و نجوم ليلك بطلت
تلمع وسط الأنين
حتى القمر من كسوفه
ماقدر يطل على
جبين السهرانيين
كل الحكاية إننا غرقانيين
في ذكرياتنا
وفي أحزان السنين
ومنين بيحي الأمان
والقلوب شائلة
حمول وأنين



علقم

علقم...

بطعم الصبر

يا عمري اللي فات

من غير ما أكون..

يا بسمه غابت

عن شفايفي

يا عبرة من عيوني

عرفت طريقها

على خدي

بطعم الصبر يا وجعي

يا غربة نفسي

في نفسي

اللي ضاعت

وسط الهموم

ونظرة حيرة مخنوقة

وسط الغيوم

بطعم الصبر

يا كل شيء

قدر.. ومكتوب



صور وحكايات

ولسه فيه صور
وحكايات
وقلب مرسوم
على الحيطان
نفضل نقلب في
الصور
نفتش في الكلام
ويفضل جوانا أمل
يدق الباب
من ورا الخيال
صورة وكتاب
وحرف حاير
على سطور الزمان
مالك يا طبيب
ضاع منك إسم
الدوا
ولا الداء صعب
ع المداواه
♥♥♥♥

القلب غافل

من بين كل البشر
كان إختياري
وعلى كل الدروب
فاض إشتياقي
و منين يا صبر
نجيب صبر ثاني
و موجة حنين
بتلعب بمركبي
بين المواني
آه يا زمان العجب
نقضي عمرنا
بين البحور
ندور على شط
للمراسي
و الشط قدام عينا
لكن القلب غافل

بياع الصبر

سألت عن
بياع الأحلام
قالوا....

مر من هنا
من زمان
سألت عن
بياع الصبر
قالوا....

خلص رصيده

و هرب

وسألت عن

بياع الضمير

فقالوا مات

زي ماماتت بضاعته

قفلت أبواب الأمل

ونزل الستار

على الفجر

و الضلام إنتشر



ألف ليلة

إسمع معايا...
كل الحكاية
كانت أميرة في
حيننا
كانت جميلة
كما بدر التمام
خطفت قلوب كل الشباب
زي حكايات ألف ليلة
واليوم بنحكي
عن سهم صاب زينة الشباب
سهم من العيون الناعسة
عيون متكحلة بنور القمر
شغلت قلوب البشر
على باب الحارة
وقف الجدعان
تحت شباك الأميرة
الساحرة
يمكن تطل م المشربية
يمكن ينولوا الرضا يمكن
يلمسوا القمر



علموه

فهموه...

إن الغرام مش كلمتين

ولا صحبة ورد

ولا دبلتين

فهموه ..

وعلموه إزاي

يكون الهوى

إزاي يكون على

عرش قلبها

وإزاي تكون هي

ملكة متوجة

يمكن لو قدرتموا تنوروه

يلحق آخر عربية

في قطر حبها



المرايا

صورة بهتانة

ومرايا كدابة

وخطوط الزمن

علمت بزيادة

مين كان يصدق

إنها كانت في يوم

حلم كل شاب في حيتها

مين يقول إن الزمن

يغدر بالجمال

لكنها لسه

في قمة الجمال



الروح هي هي

والسحر غالب على سنّها

لكنها...

لسه بتسأل المرايا

مين اللي خربش صورتها

لساها مش مصدقة.



يا واحشني

كان فيه أغنية زمان
بتقول... يا واحشني
لك مني الف سلام
طب والقلب اللي نسااه؟...
حطه في خانة الحرمان
آه والله..

كده راح يبقى تمام
أو أقولك...
حطه في محلل الصبر
ساعتين أو حتى يومين
أو روح في قلب الصحرا
دور على بير مية
أرميه فيها يغسل همه
أو يروي عطشه
أو يمكن يغرق
ده تمام.. كده حليتها..؟
أيوة تمام
طب نعمل إيه ويا الأيام..

نرجع نسمع يمكن نفهم
كلمة ف كلمة العمر يعدي
تلقى حياتك
قفلت باب الأحلام

.....

تغيير

و بين الطلة و الطلة

كثير تغيير

و بين النسمة و الثانية

سحابة صيف

و بين النظرة و النظرة

سهام بترشق

تصيب القلب

ولا نعرف ليه



أنا مصر



أنا مصر
أنت مين
أنا حضارة آلاف
السنين
قلبي مفتوح
للجميع

بس ياخسارة
أنت ماتعرفش
إحنا مين
معذور دمك خليط
مش أصيل
نرجع نقول من جديد
أنا مصر
انت مين
انا أم الدنيا
وقدر الأم
تتحمل رزالة
الصغيرين
وتعلمهم الأدب
قدرنا نكون
حضن دافي
يتلقى طعنات الناكرين
أنا مصر

التار



وحلفنا ماتنام
ولا يهدا لنا بال
إلالمنا نأخذ تار
ولادنا بأيدينا
وصدق الرجال
ما هدي بالهم
إلا بالانتقام
بعثوا المجرمين

الإرهابيين
بعثة لجهنم
نام و إرتاح يابطل
حقك إخوانك
جابه
واقفين أسود
مكانك
بيكملوا المشوار
والله يامصر
..مهما يحاولوا
شعبك وجيشك
صاحيين
قولوا لعصابة الدول
اللي بتمول الغدر
يومكم قريب
وأبدأ ماتتكسر مصر

موتوا بغيظكم
إحنا دولة قامت
قبل التاريخ
ماينكتب

.....

يوم العيد

..موهوم

ياللي تفكر

إننا نسلم

..موهوم

مش هتقدر تكسر

فرحتنا

تقتل .. تفجر

في يوم العيد

قصدك نحزن كلنا

الحزن واجب على

ورد الجنائين

زينة شبابك يابيهية

لسه بيدفعوا التمن

حالفين يصونوا

الارض والارض

تقتل شهيد يتولد

مليون تحت الطلب

خايب ولسه عندك

امل تنتصر

من إمتى والشرازم

بتهزم دول

خدعوك وفهموك

انك بترضي ربنا

والحق إنه حكم عدل

هيجيبنا حقنا

ماتزعلش يامي

آبنك عريس فضل

انه يكون

في الجنة يوم العيد

اليوم عيدك يا مصر
وعيد الشهيد عند ربنا
دم الولاد غالي
وترابك يا وطن غالي

.....

إصحوا.. فوقوا..

يا بهية
فيك يا به
فيكي سحر
صعب تتخطاه العين
فيكي لمة عيلة
وجارة تسمع ندايا
قبل أهلي ما يسمعه
وطفل اسمر
بيتحدي النجوم
ونسمة من نيلك
ترفع شال الصبية
فيكي إيه..
يا غالية قولي
لما العيون من سحرك
لاموني
قالوا عيب..
عيب عليك متبقوا فيها
عيب تكونو امش

حاسين بيها
عيب تقولوا عنها قاسية
دي بهية
دي الحنية
بس احنا اللي بنتدلح عليها
طب فيها أيه....
فيها إنها صابرة
وثابتة ع الطمع
من كل حنة
ع الخيانة
وهي جاية من جوه
إصحوا حبة فوقوا حبة
دي الصبية
من آلاف السنين
شائلة هم
والأهم.. كن أمين..
كن صاحب ضمير
تلقى الضحكة مالية
وشها الحزين

...

يابهيّة

قولي وإحكي
يابهيّة ياأبية
سمعي
صوت ناياتك
علميني
حروف هواكي
ولاحتى فسريلي
سر عشق ولادك
داأنت ياأرض الأنبياء
جنة ربنا
يمكن عشان كل ده
عاشقين عيونك
حاضنين ترايك
بين كفوفنا
حافظين عهدنا
مصرتحيا
مهما روحنا

مصر حضارة

مصر حضارة

مصر منارة

قول من هنا للصبح

فمصر

سحر عجيب

جو رهيب

حب وعشق

شعب عظيم

شال مالهم كثير

بس بيضحك

قلبه بيضحك

عاشق ارضه

واللي بيجي عليه خسران

ف كل زمان

واللي ماشفش

مصر بجد

يبقى ما شاف

ف حياته إعجاز

إكسر... تخسر

قالوله.. إكسر
قلته.. تخسر
قالوله.. فجر
قلته تقدر!؟..
دي مصر يابني
دول فراغنة
يوم ماتقدر
تبقى النهاية
يوم ماتكسر ها
دي القيامة
إصحى وصح صح
دي بلدك أكبر
من كل شر
وربك أكبر
منك لمكر
ومايقدر عليها
الجبان خاين الأوطان

....الفرق

الوش بقى ألف وش
بيدعي الوطنية
حتى لما بيقول
تحيا مصر
مصر مش مصدقاه
مصر عارفة ولادها
العاشقين
اللي قلوبهم هايمة
في حبها
عارفة وشايفة
زي الخال ما قال و
المنافق كلامه
لايتوزن ولايتقال

.....

خلص الكلام

من زمان
الحق حق
وعمرنا مانسيناه
دم الشباب
اللي فداننا كلنا
علشان نعيش
أخدوا الرصاص
في الصدور... إتفجروا
عشانك يابيهية
إحنا فاكرين
ومش ناسيين
والصورة واضحة
لينا كلنا
مين اللي ضحى
ومين اللي خان
بس الجبان
هو اللي بينكر حقنا

ويا مصر

قومي إنهضي
ودعي الأحباب
يامصر
زفي الجدع
اللي بعمره فداكي
يا مصر
إعلي وإعلي
وعلي الصوت
خليه يدوي في الفضا
يدخل الرعب
في قلوب العدا
ده دم ولادك روى
أرض سينا
أرض الجدود
ده دم ولادك روى
أساطير فوق الخيال
عن شجاعة الأسود

ولسه التاريخ هيكلي

عنا وعنهم

عن شعب ما يعرف

.. غير الخلود

.....

هي دي بهية

أم كل الدنيا

ديا

حضن الدفا

عشق السنين

طيبة الأهل اللي

مالية الشوارع

قاعدة ع الكورنيش

لقمة تتقسم ما بينا

ضحكة في الوشوش

الشقيانين

بسمة طفل

تملانا حنين

طب تعال

مد إيدك

بسم الله

كل معانا

دي بهية

حط كلمة

حط كلمة

جنب كلمة

تلقى إسمي

بيناديك

حط صورة

جنب صورة

تلقى حضني

بيناديك

وأنت عارف

إن قلبي

عمره يوم

مايجافيك

دا إنت إبني

مهما قلت

مهما خفت أو زعلت

يوم هتفهم

إن عمري ماكنت

قاسية

بس الهموم
في أرضي راسية
وإوعى تنسى
يوم بهية

.....

شهداء أحياء

أيقونة عشق بلدي
موال غرام مصري
والنصر جاي يا ولدي
يمكن تظنه بعيد
أنه ميعاد عنيد
وأظن أنه أصبح قريب
أسمع صوته في الجو
وتحيا مصر تدوي
ترعب الأعداء

.....

ويا مصر..

توب الحزن ما مفارقك

قلبك على ولادك داب



م الألم

وريحة الخاين فاحت

في البلد

متلطة إيديهم بدم

ورد الجنائين

رجال شرفاء غير

كل البشر

عقيدتهم إيمان

بالأرض والعرض

وسيف الحق يامصر

عمره ما انكسر

ح قول حقك علينا دين

قوم يابن بلدي
شد العزيمة
هات تارالي إنغدر
هات حق البلد
تعيش مرفوع الراس
وإحنا معاك نربط حجر
على القلب اللي إنكوى
نصبر .. وإن راح جدع
فيه مليون جدع
روحه فدا الوطن

.....

الشهيد

دمك روى الأرض
الموت لأجل الوطن
عندك عقيدة
والخيانة في دم ناس
مش مننا
هما ناس وإحنا ناس
صدق اللي قالها
دول مش من دمننا
..تقتل ..تخون
تبقى عميل
..قولي بقي
إزاي هتقابل ربنا

.....

فانوس

ياشهر الصيام
هلت معاك روايح
زمان
فانوسي ينور
في إيد العيال
وصوت الشيخ رفعت
بیرفع الآذان
ومدفع بيدوي
في كل المكان
هيصة وفرحة
في كل ميدان
صواني الكنافة
بتاعة زمان
وخير بلادنا
يفرح الغلبان
الله عليكى يامصر
ياأم البلاد

.....

تاھت خطوتي

بين الشوارع والحارات
ونبض القلب حاير
يجري ولا يخليه بطيء
وصوت رخيم جاي
من بعيد
ينده على القلب
اللي عشق
يغني للأهل في الدار
يتغزل في جمال القمر
وأنا أرسم على الشباك
صورة القلب اللي إنكسر
وأسمع غناه للجرح والدوا
طب... وأنا
هاقدر ألاقي عندك
الدوا
..رد عليا ياعمنا
أنت الطبيب ولا
..جاي تصحي جرحنا

مصرنا

كلمني عن مصرنا
عن فرحة الولاد
في الشوارع
عن ضحكة صافية
فوق الشفايف
عن إيد بتاخذ بإيد مسن
تعيه الشارع
وجندي واقف في
عز الحر
في خدمته
وأمهات بيدعوا له
ويهتفوا
كلمني عن إيد
شايلة السلاح
وإيد بتعمر البلاد
إنزل وإمشي
في وسطنا
ربع وكل من أكلنا
أحلم ببلدك زينا

صلي ركعتين
وزور الحسين
طل في وشوش
الشقيانين
بوس إيدين أهلك
وأحمد ربك
على نعمة مصرنا

.....

وبهدوء ... يفوت اليوم

وبهدوء يرخي الليل

ستارة من هموم وويل

سمعي ياناي تقاسيم

حزينة تصحي جرح نام

ولاصوت طبلة تدق دقات

كأنها دقات مسرح الحياة

في انتظار رفع الستار

عن رواية عمر فات

وقصة حلم مات

سمعي صوت طبول الحب

غني معانا مواويل العشق

المخنوق في قلب الحزن

.....

العيب فينا

إجمع حروف
قصايد عشقتنا
أعزف على حلمنا
...وقولنا
إزاي يكون نهر
الحنين
بيمر من عندنا
وإزاي تكون البساتين
عطشانة
والماية هنا
.. قولنا
يمكن يكون العيب
فينا كلنا
يمكن يكون النهر
بيفيض
في أرض غير أرضنا

.....

همسة... في سكون

الليل

وصوت جميل بيردد

حروف مرصوفة

ودقة قلب

واحد من المحروسة

ونجوم بتلمع

في سما حلمي

وده ولد بيرسم

على أرض الشـارع

هلال ونسر

هلال ينور

ونسر يعلى في السما

ياخدنا للأحلام

وصوت العزف

يملا المكان

يرمي السلام

.....

الحلم ... ألوان

فرشت على

أرض الأماني

ضلها

والشوق للقا

شعل دروب

القلب

بنار الهوى

وهمس الليالي

بين العاشقين

في الليل سرى

يحكي لنا قصة من

قصص العاشقين

من زمن

فات وعدى قبلنا

.....

طوف ... وشوف
بلاد وبلاد
عدي بحور
وعشق الجميلة
في قلبك مايروح
كنت فاكّر
أنك هتبعد عنها
كنت فاكّر أن قلبك
في البعاد يرتاح
طال الغياب
وانت بتحلم بشمسها
بضلة تحت شجرة
في أرضها
وعنين حبيبتك
بتحضن
عنيك ساعة اللقاء..
عرفت معنى الشوق
عرفت معنى الغياب
عن روح في
بلدك سيبتها
أرجع ودق

على أوتار قلبك
صحي اللي نام
وطبطب على
القلوب المتحيرة

.....

النجمة.... مالت

على خد القمر
مسحت بنورها
دمعة كانت م السهر
قالت يا باكي ليه البكا
ليه الشكوى
جوة نفسك تتخفق
إحكي يا قمرنا
قول مين سهرك
مين خلى دمعك
ينزل في السهر
قال القمر
عاشق حزين مشتاق
قلبه من الغياب إنفطر
لو كنت أرجله الحبيب
والبسمة اللي على كانت
على الوشوش تترسم
كانت تبات سعيدة
وأنا من مكاني
أنور ليهم وابتسم
لكن الدمع غلبنى
على القلب الحزين المنكسر

ردت نجوم اللي بغنوة حلوة

قالت...ياقمر

نورك جوه القلوب ما ينطفي

ومسير الطير يرجع لعشه

دا العشق جواهم

عمره ما ينتهي

.....

كلمني....

عن الأمان

وإزاي العين

تقدر تنام

والقلب مجروح

والبال مشغول

إزاي تقدر تكون

مرتاح الضمير

وأنت سبب في

كسر خاطر

أوجرح قلب مسكين

قولي إيه معنى

الخوف يسكن

جوه قلبك

وأنت بتبتسم

والنوم مخاصم العيون

وأنت بتفتخر

أنك كسبت رهان

على قلب يوم حبك

وأنت عمرك

ما كنت تحلم
في يوم تترسم
على جدرانه
أوحتى تخطر بباله

.....



سمعي صوت الست

أطربني بجمال اللحن

أسرح مع الأمل

أعدي بحور اليأس

صدق عم بيرم لما قال

كلام ولا في الخيال

"بالأمل أسهر ليالي

...وأملكك ليلى ويومي"

ياكل عاشق قوم

علق الأحلام على

شباك الرجاء

خلي إيمانك سلاحك

فبمره دايمه نهارك

ده الامل شمس وقمر

والحياة دروب وعبر

دق معايا.. قول ويايا..

يارب ياكريم

فيه خيرجاي

دا اللي خلق

ماينسى يوم

عبد ضعيف..

.....

بالورقة والقلم

بالورقة والقلم
نرسم سوا رسمة
نرسم علم يرفرف
على جبين البيوت
في كل شارع في البلد
نرسم عيال
و هيصة و لمة
طبلّة ندق عليها
بحروفنا
مواويل عشق
للمحروسة و نغني
نحكي في غنانا
كل أمجاد جدودنا
نعلم ولادنا معني
الأرض و حدودنا
نزرع بالكلام
بساتين محبة
تخضر عيدانها
في قلوبنا

ليالي القمر

على باب الرجاء
في ليلة
من ليالي القمر
طل القلب اللي بين الضلوع سهر
فتش على نسمة
من نسيمات السحر
على بسمه فوق
شفاف القمر
وعلى تقاسيم الناي
رقص نبضه وإرتجف
كالطير اللي خايف
يتوه عن عشه
في الفضاء
غني و قول يا ناي
عن قلوب هايمه
تتمنى الوصال
ونسمة حائرة بتدور
على جبين القمر

.....

محطات الحياة

نهر من الحنين
يفيض على أرض
الشجن
تجري دموعه تروي
زرعة الندم
تملا محبرة الأنين
وبريشة عشق
مخنوق في قلب
الشوق
نكتب قصايد شجن
بين سطورها
جرح و ألم
وفي حروفهانغم
نغم حزين
نعزفه على الوتر
داب من الوجد
وإحنا بنستنى
قطر الأمل
يزعق على القلب

اللي إنفلق
من شدة الهم و الألم
بنستنى على
رصيف الحلم
لكن نفوق..
نلقى محطات
الحياة فاتت
في غفلة من الزمن

.....

